

# BULETIN AL - IRSYAD

UNIT PENDIDIKAN ISLAM & MORAL (UPIM), JABATAN PENGAJIAN AM

Penulis  
Jemputan :  
Dr. Jailani  
Abdul Kadir

## TAKWA RAMADHAN YANG INGIN DIGAPAI

**“Hai orang-orang yang beriman, diwajibkan atas kamu berpuasa sebagaimana diwajibkan atas orang-orang sebelum kamu agar kamu bertakwa”** (Surah al-Baqarah: 183)

**D**ari ayat di atas kita melihat bahawa Ramadhan yang diberkati itu dihadirkan kepada umat manusia yang beriman supaya akhirnya boleh mencapai tahap orang yang bertakwa. Ketakwaan tidak memberatkan diri seseorang untuk melakukan ibadat kepada Allah, kerana melakukan amal itu sudah menjadi watak mereka. Orang yang bertakwa kepada Allah akan melakukan ibadat secara zahiriyah dan batiniyah tanpa merasa berat melakukannya.

Dalam mencari takwa bersama Ramadhan, perlu diberi perhatian bahawa, sekiranya seseorang muslim tidak dilengkapi dengan ilmu dan kesedaran khususnya dalam dunia yang serba maju dengan teknologi komunikasi sekarang, ia boleh menjejaskan usaha untuk menggapai takwa dari Ramadhan tersebut.

Sebagaimana hari ini ada orang bila melakukan sesuatu aktiviti, sehinggakan aktiviti ibadat pun akan dikongsikan maklumat kepada kenalan-kenalan mereka dalam dunia maya. Biasa kita membaca dalam media sosial sama ada *Facebook*, *Whatsapp*, *Instagram* dan sebagainya ungkapan seperti “*Alhamdulillah telah selesai solat tahajud*”, “*Alhamdulillah telah selesai solat dhuha*” atau “*Alhamdulillah telah habis satu juzuk al-Quran pagi ni..*”. Kalau tidak hati-hati, dibimbangi akan ada perasaan riya’ dalam hati. Seseorang yang riya’, ia seumpama pakaian dan badannya sentiasa kelihatan bersih, tetapi hatinya najis. Kezuhudan dan ketaatannya adalah secara zahiriyah sahaja. Pada zahirnya, ia seperti orang yang giat dalam agama, namun pada batinnya ia adalah perosak agama.

**Takwa Ramadhan Yang Ingin Digapai**

*Dr. Jailani Bin Abdul Kadir*

**Ramadhan Bimblinglah Daku 9 Tips Agar Tidak Tidur Selepas Sahur**

*Berpuasa, Tapi Tidak Solat  
Roshadah Binti Abu Bakar*

**Ramadhan Penyeri Kehidupan**

*Azirah Binti Seman*

**Tuntutan Ramadhan**

*Suhaila Binti Mustaffa*

**Ramadhan, Sesekali Teringat ...**

*Ainul Farhaan Binti Harun*

**Jadikan Ramadhan Bulan Berjimat**

*Razak Bin Nordin*

**Qadha’ Puasa & Fidyah**

**Sentiasa Ada Untuk Memberi**  
*Norhafizah Binti Mohd Ghazali*

**Permata Yang Ditinggalkan**

*Zuraila Binti Mohd Zain*

**Sambutan Hari Raya Menurut Sunnah Nabi**

*Mohd Hanafi Bin Jusoh*

**Analisis Perang Tabuk**

*Rosmawati Binti Razak*

ISSN 2637-0247



*“Raih Keberkatan Dalam Amalan”*



Bagaimana ingin menggapai takwa kalau tanpa ilmu pengetahuan dan kebijaksanaan dalam beramal. Sesungguhnya ramai orang yang beramal tetapi ia lupa bahawa amalan kebaikan itu boleh menjadi sia-sia di sisi Allah. Ini boleh berlaku apabila adanya sedikit di hati untuk mendapat pujian di hati manusia bukan sahaja di lidah manusia. Contohnya, kita mungkin ada terbaca dalam kumpulan media sosial apabila seseorang sering kali menyiarkan atau membuat perkongsian nasihat-nasihat agama, tazkirah-tazkirah agama, kuliah-kuliah agama dan sebagainya yang dinilai sebagai suatu amal kebaikan iaitu menyebarkan ilmu, namun waktu yang dipilih tersebut tidak sesuai iaitu pada pukul tiga pagi contohnya, yang kebiasaannya waktu seseorang hamba Allah berdiri malam menunaikan solat tahajud. Kebimbangan pada tindakan ini akan ada perasaan di hati orang yang mengongsikan nasihat-nasihat tadi perasaan bahawa aku ini telah bangun beribadat kepada Allah dikala orang lain masih lagi diulit mimpi.

Dalam usaha menggapai takwa, seseorang muslim perlu berhati-hati dalam semua tindakan sama ada melibatkan muamalat dan ibadat supaya segala amal kebaikan akan dihitung sebagai amalan yang diterima Allah pada hari pengadilan nanti. Sifat takwa boleh diumpamakan sebagai seseorang yang berjalan pada satu jalan yang penuh berduri. Perjalanan tersebut hendaklah diteruskan namun, perlu berhati-hati supaya tidak terpijak duri.

Melakukan ibadat itu memang mudah tetapi untuk memastikan ianya diterima Allah amatlah sukar kecuali dengan mengikut panduan al-Quran dan Sunnah yang ditinggalkan oleh baginda Rasulullah SAW kepada kita sebagai pedoman.

Moga segala ibadat yang kita lakukan tidak sesekali dicampuradukkan dengan perkara-perkara rekaan yang telah ditokok tambah dari ajaran yang dibawa Rasulullah SAW.



**“Alhamdulillah telah selesai solat tahajud”, “Alhamdulillah telah selesai solat dhuha” atau “Alhamdulillah telah habis satu juzuk al-Quran pagi ni..”.** Kalau tidak hati-hati, dibimbangi akan ada perasaan riya’ dalam hati.

**Bagaimana ingin menggapai takwa tanpa ilmu pengetahuan dan juga kebijaksanaan dalam beramal? Sesungguhnya ramai orang yang beramal tetapi ia lupa bahawa amalan kebaikan itu boleh menjadi sia-sia di sisi Allah. Ini boleh berlaku apabila adanya sedikit di hati untuk mendapat pujian di hati manusia bukan sahaja di lidah manusia.**

**Sifat takwa boleh diumpamakan sebagai seseorang yang berjalan pada satu jalan yang penuh berduri. Perjalanan tersebut hendaklah diteruskan namun, perlu berhati-hati supaya tidak terpijak duri.**

# TUNTUTAN RAMADHAN

Suhaila Mustaffa

**“Sambutlah Ramadhan dengan jiwa terbuka  
Seperti ketibaan orang yang kita cinta  
Dengan ucapan  
Ahlan Wa Sahlan Marhaban Ya Ramadhan  
Hati gembira pintu terbuka  
Rahmat Allah Yang maha Besar”....**

Bait-bait lirik nasyid Rabbani menjadi halwa telinga tatkala Ramadhan kian menjelma. Begitulah terpamer kemuliaan bulan barakah ini hinggakan seawal Rejab, namanya sudah dijulang-julang.. Ramadhan Kareem..



## MADRASAH RAMADHAN

“Ummi, esok dah nak puasa. Nanti ummi kejut sahur ya. Adik nak puasa.” Pinta si anak kecil yang baru menjengah umur 5 tahun. Hajat si kecil untuk berpuasa, walaupun pada asasnya belum ada kewajipan untuknya. Indahya Ramadhan, seisi keluarga ‘berlumba- lumba’ untuk mengambil peluang mengumpul pahala ibadat. Kecil, besar, tua dan muda turut sama meraiikannya.

**“Sesiapa yang berpuasa pada bulan Ramadhan dengan penuh keimanan dan ihtisab (mengharapkan pahala) maka diampunkan baginya dosa-dosa yang lepas”.** (Riwayat al-Bukhari no. 38 dan Muslim no. 760).

Merujuk kepada sabda Nabi SAW di atas, maka tidak hairanlah sekalian manusia yang benar-benar mengimani hadis ini akan berhempas-pulas mengisi ruangan Ramadhan dengan memperbanyakkan ibadat serta menyempurnakan puasanya. Namun sebaliknya, ada juga yang sekadar menjadikan Ramadhan rutin puasa setahun sekali. Kosong dan sia-sia menahan lapar dan dahaga dari terbit fajar hingga terbenam matahari.

**“Sangat malang, orang yang berkesempatan melalui Ramadhan tetapi tidak diampunkan dosanya”.** (Ibnu Khuzaimah (Sahih), al-Sunan al-Kubra oleh al-Baihaqi).

Justeru, sebagai mukmin yang inginkan darjat tertinggi rebutlah peluang keemasan setahun sekali yang Allah tawarkan ini dengan sebaiknya. Ramadhan sebagai madrasah (institusi/ sekolah), dipenuhi dengan pelbagai ‘silibus’ pengajiannya mesti dihadap sehabisnya dalam tempoh sebulan. Jadual puasa, solat sunat terawih, tadarus al-Quran, qiyamullail, iktikaf, sedekah dan banyak lagi amalan perlu diatur secantiknya agar dapat ‘bergraduasi’ dengan jayanya kelak dengan ganjaran ‘sijil takwa’. Firman Allah SWT yang bermaksud:

**“Hai orang-orang yang beriman, diwajibkan atas kamu berpuasa sebagaimana diwajibkan atas orang-orang sebelum kamu agar kamu bertakwa”.** (Surah al-Baqarah: 183).



## PUASA 11 BULAN

Setelah sehari kepenatan berpuasa, anak kecil menyambung pertanyaan. “Ummi, kita puasa sebulan saja kan? Satu hari adik puasa pun dah tak larat la ummi.. Kenapa kita tak kena puasa sehari saja?” Bertalu-talu soalan dari seorang makhluk Allah yang belum mengerti hakikat puasa.

Si ibu tersenyum sinis melihat gelagat anaknya. “Adik, kita puasa bulan Ramadhan hanya satu bulan, tapi selepas tu sambung lagi sebelas bulan!” jelas si ibu. Namun jawapannya itu cukup untuk membuatkan mata anaknya terbeliak besar. Sebelas bulan?!

Ya, Ramadhan cuma medan perintis. Kita perlu perbaiki, perkukuh justeru pertingkatkan amalan di bulan mulia ini sebagai bekal menghadapi sebelas bulan mendatang! Alangkah ruginya sebulan yang diharungi dan dipelihara setiap tanduknya dengan penuh teliti, akhirnya tercemar setelah berlalunya bulan barakah ini.

Perlu diakui bahawa puasa banyak memberi faedah dari sudut jasmani dan rohani. Manfaat jasmani tidak perlu lagi diperkatakan kerana ia telah banyak diperbincangkan dan diperakui oleh para ahli perubatan. Fokus kita adalah kepada manfaat rohani.

Bagaimana manfaat ini akan terus dirasakan pada waktu dan ketika selepas Ramadhan. Puasa menjinakkan nafsu yang liar, melatih untuk bersabar, memahami erti kefakiran, kesusahan dan sebagainya. Jika dilihat kepada hikmah puasa ini cukup untuk membentuk keperibadian seorang muslim yang sejati menjalani kehidupan seharian. Namun, adakah Allah menginginkan semua itu berlaku hanya pada satu bulan sahaja? Sesekali tidak! Beza kemuliaan Ramadhan berbanding bulan-bulan yang lain hanya terletak pada puasa wajib sebulan, Lailatul Qadar dan solat sunat terawih di samping nilai pahala berlipat kali ganda. Bererti, setelah berlalu Ramadhan tiada istilah tamat bagi ibadat-ibadat rutin yang lain seperti sedekah, qiyamullail, iktikaf, membaca al-Quran. Malah perlu diteruskan dan dipertingkatkan setiap masa melawan kehendak nafsu syaitan yang sentiasa membelenggu jiwa.



*“Raih Keberkatan Dalam Amalan”*



## SYAITAN DIBELENGGU

"Hmmm.. bulan puasa senangnya buat ibadat sebab syaitan dibelenggu!". Ustaz kata, syaitan semua kena 'ikat'. Betul ke Ummi?". Belum puas bertanya si anak kecil ini mencari kepastian.

**"Apabila masuk sahaja Ramadhan, maka pintu-pintu Jannah (Syurga) pun dibuka, pintu-pintu jahannam ditutup, dan syaitan-syaitan pula dibelenggu."** (Riwayat Muslim no. 1079)

Benar, syaitan dibelenggu. Justeru, janganlah syaitan menjadi ikutan. Hanya menjadi "soleh" seketika pada bulan Ramadhan. Kita ikat dan belenggu diri kita untuk Ramadhan sahaja. Malah, ada saja yang hanya mampu mengawal nafsu dari mula terbit fajar hingga laungan azan maghrib, akhirnya perjuangan melawan nafsu tadi dicemari dengan melantak puluhan juadah sehingga tidak tertanggung oleh perut. Juga kesudahan perjuangan melawan nafsu turut sama berakhir setelah berlalu Ramadhan. Rugi serugiruginya.

Menurut penjelasan Imam Al-Qurthubi, "Bahawasanya gangguan syaitan hanya berkurang terhadap orang-orang berpuasa yang memelihara syarat-syarat puasa dan adab-adabnya. Atau yang dibelenggu hanya sebahagian syaitan sahaja, iaitu para penentang yang ganas dari kalangan mereka sebagaimana dinyatakan dalam sebahagian riwayat. Atau yang dimaksudkan adalah berkurangnya kejahatan dalam bulan Ramadhan, dan ini merupakan perkara yang dapat dirasakan, dimana kejahatan ketika bulan Ramadhan lebih sedikit jika dibandingkan dengan bulan-bulan selainya. Apabila semua syaitan dibelenggu, juga tidak menjadi sebab untuk tidak akan berlakunya kejahatan dan kemaksiatan. Kerana sebab berlakunya kemaksiatan itu turut didorong oleh sejumlah faktor lainnya selain dari faktor syaitan. Boleh jadi disebabkan nafsu yang buruk, tabiat yang kotor, dan syaitan-syaitan dari kalangan manusia sendiri." (Ibnu Hajar, Fathul Bari, 4/114)

Maka jelas di sini, syaitan bukan alasan utama. Paling penting, usaha dan kemahuan kita untuk menjadi hamba Allah yang bertakwa sentiasa subur. Kita manusia biasa, imannya bertambah dan berkurang. Disebabkan itulah kita sentiasa perlu memproses diri kita tanpa henti. Syaitan tidak akan pernah jemu menggoda. Maka kita juga tidak boleh bosan dalam melawannya!



## LA'ALLAKUM TATTAQUN

Takwa. Seringkali disusuli dalam firman Allah yang berbentuk perintah dan suruhan. Jika disorot kembali maksud ayat 183, surah al-Baqarah di awal tulisan tadi menyatakan tentang kewajipan berpuasa dan diakhiri dengan pengharapan iaitu semoga atau agar beroleh takwa. Perkataan semoga atau agar ini datang daripada perkataan 'la'alla' iaitu sebuah pengharapan kepada perkara yang tidak mustahil akan berlaku. Allah tidak bersahaja memilih perkataan 'la'alla' ini sedangkan ada banyak lagi perkataan lain yang seerti dengannya. Inilah kehebatan dan ketinggian kalamullah! Rahsia di sebalik perkataan ini dipilih adalah untuk menunjukkan sesuatu yang kita harapkan (takwa) itu mestilah didahului dengan usaha yang keras dan gigih. Sememangnya itulah yang dituntut dalam setiap ibadat yang difardhukannya. Ganjaran takwa ini juga bukan hanya terpakai di bulan Ramadhan ini sahaja. Dengan kata lain, sesiapa mencapai takwa di bulan Ramadhan pasti sebelas bulan yang seterusnya juga dilalui dengan sifat takwa!



- **Menjadikan Ramadhan sebagai medan untuk memproses dan mempertingkatkan amal ibadat.**
- **Meneruskan setiap amal soleh** walaupun setelah berakhir Ramadhan.
- Menjadikan diri kita sebagai hamba **yang tidak terbelenggu dengan syaitan** di dalam dan luar Ramadhan.
- Berusaha untuk memperoleh dan **mengekalkan ketakwaan** dalam menjalani segenap penjuruh kehidupan.

# RAMADHAN PENYERI KEHIDUPAN

Azirah Seman



Ramadhan bulan penuh keberkatan. Di dalamnya ada keajaiban dan kemuliaan. Pesta ibadat bagi mereka yang mengetahui kelebihanNya. Setiap muslim diperintahkan untuk berpuasa di bulan Ramadhan. Ibadat puasa adalah antara ibadat utama dalam Islam yang banyak kelebihanNya. Diwajibkan berpuasa kepada setiap muslim agar menjadi manusia yang beriman dan bertakwa serta sentiasa mentaati perintah Allah SWT dan menjauhi laranganNya. Allah berfirman yang bermaksud:

**“Wahai orang-orang beriman, diwajibkan atas kamu berpuasa sebagaimana diwajibkan atas orang-orang sebelum kamu agar kamu bertakwa.”** (Surah al-Baqarah: 183)



Melaksanakan puasa Ramadhan dengan penuh penghayatan dapat menanamkan sifat patuh yang menyeluruh dalam diri setiap muslim. Kepatuhan seperti itu merupakan langkah awal bagi meraih takwa. Ketakwaan kepada Allah SWT merupakan dasar utama dalam menjalani kehidupan sebagai muslim yang beriman. Takwa adalah takut dengan azab-azab Allah SWT, memelihara diri dari melakukan dosa serta menjaga diri daripada melakukan perbuatan-perbuatan yang keji dan tercela. Ibadat puasa terbukti dapat memperbaiki jiwa, meninggikan darjat serta dapat menjauhkan diri dari hal-hal yang dapat merosakkan diri dan jiwa. Muslim yang bertakwa sentiasa ingin memperbaiki diri, meluruskan kehendak dan mendekatkan diri kepada pencipta bagi meraih ketakwaan dan keberkatan dari Ilahi.

dalam menjaga anggota tubuh yang bersifat lahiriah dan kekuatan rohaniah. Puasa dapat melindungi diri dari faktor-faktor yang dapat merosakkan diri dan jiwa. Puasa menjaga kejernihan hati dan kesihatan anggota tubuh. Ia merupakan pembantu yang paling besar dalam merealisasikan ketakwaan dalam diri seorang insan di samping menjaga diri dari jatuh ke dalam jurang dosa dan maksiat. Antara manfaat puasa kepada tubuh badan ialah dapat membersihkan usus, memperbaiki pencernaan, membersihkan tubuh dan mengurangkan lebihan lemak dan mengatasi kegemukan. Sementara dari sudut rohani pula puasa dapat mematahkan nafsu dan mengosongkan hati hanya untuk berzikir kepada Allah SWT. Di dalam ibadat ini, jelas sekali terkandung makna kesihatan yang luas manfaatnya terhadap kesihatan manusia.

Rasa lapar dan dahaga ketika berpuasa memberikan pengalaman yang sangat bererti kepada kita sebagaimana beratnya penderitaan yang dirasakan oleh golongan fakir dan miskin. Rasa lapar dan dahaga yang kita rasa akan segera berakhir apabila tiba masuknya waktu berbuka, tetapi penderitaan lapar dan dahaga fakir miskin ini entah bila ada penghujungnya. Ibadat puasa dapat mencambahkan rasa keprihatinan kepada golongan yang kurang bernasib baik ini. Oleh itu, sebelum Ramadhan berakhir kita diwajibkan untuk mengeluarkan zakat. Ibadat zakat ini bukan hanya untuk membantu fakir miskin bahkan dapat menghilangkan kekotoran jiwa dan mengikis sifat bakhil. Amalan bantu membantu ini akan merapatkan lagi golongan kaya dan miskin sekaligus menguatkan kesatuan umat Islam.



Puasa dapat mengendalikan nafsu dan emosi. Dalam keadaan perut yang lapar, tekak yang dahaga, ia dapat mendorong seseorang mengawal nafsu makan dan meredakan kemarahan. Sesuatu pekerjaan tidak mungkin dapat diselesaikan dengan rasa marah atau bersikap emosional. Kesabaran dan ketabahan merupakan sifat yang terpuji. Kesusahan dan kesengsaraan yang datang menimpa diri akan sabar dihadapi kerana puasa itu melatih diri menjadi sabar, kuat dan tahan derita dalam menghadapi cabaran kehidupan.



Saling kasih mengasihi dan sayang menyayangi merupakan prinsip terpenting tertegaknya masyarakat Islam. Amat sukar bagi golongan kaya untuk mengasihi golongan fakir miskin dengan kasih sayang yang sebenar tanpa mereka merasai kesakitan, kepahitan, kelaparan dan penderitaan yang ditanggung. Berpuasa merupakan sebaik-baik pengalaman yang diperoleh oleh golongan kaya mengenai penderitaan golongan fakir miskin. Ibadat puasa akan menimbulkan rasa kasih dan sayang sesama insan serta rahmat dan belas kasihan di dalam jiwa golongan kaya. Jelas sekali penyariatan ibadat puasa akan dapat membersihkan jiwanya dan menghaluskan perasaannya.



Harus kita sedari Ramadhan merupakan bulan pendidikan dan latihan. Ibadat puasa pula merupakan salah satu amalan yang amat dicintai oleh Nabi Muhammad SAW. Allah SWT menjanjikan keutamaan dan manfaat yang besar bagi muslim yang mengamalkannya. Kemuliaan bulan Ramadhan tidak hanya terletak pada ibadat-ibadat berbentuk amali tetapi turut dinilai dari peningkatan takwa yang dimulai dari bulan Syawal hingga Ramadhan yang akan datang. Oleh itu, serikanlah Ramadhan ini dengan pesta ibadat dan semoga rahmat dan kasih sayang Allah SWT sentiasa mengiringi kita.



Hikmah disyariatkan puasa ialah dapat menyihatkan tubuh badan. Puasa mempunyai pengaruh yang kuat

*“Raih Keberkatan Dalam Amalan”*

# RAMADHAN, BIMBINGLAH DAKU..

Roshadah Abu Bakar

Ramadhan adalah madrasah tarbiah yang membimbing umat Islam agar tabah dan cekal dengan setiap ujian dan dugaan yang dihadapi. Ia juga dijanjikan dengan pelbagai ganjaran istimewa yang disediakan oleh Allah SWT kepada hambaNya. Ramadhan adalah:



Bulan pembersih iaitu **tazkiyatun nafs (pembersih jiwa)** kepada setiap umat Islam agar sentiasa dipandu arah dalam redha Allah SWT selalu. Selain daripada menahan diri daripada makan dan minum, umat Islam juga diwajibkan melaksanakan segala perintah Allah dan meninggalkan segala laranganNya.

Ramadhan adalah medan yang terbaik untuk menundukkan nafsu manusia, perasaan hasad dengki, khianat, mengadu domba, hasutan dan sebagainya perlulah dibuang sejauh-jauhnya dalam diri. Selain itu terdapat beberapa amalan yang disunatkan sepanjang bulan Ramadhan antaranya adalah solat terawih, tadarus al-Quran, qiyamullail, sedekah, zikrullah dan lain-lain lagi yang turut dijanjikan ganjaran pahala istimewa di sisi Allah SWT. Rasulullah SAW bersabda:

**“Sesiapa yang berpuasa pada bulan Ramadhan dengan penuh keimanan dan ihtisab (mengharapkan pahala) maka diampunkan baginya dosa-dosa yang lepas”**

(Riwayat al-Bukhari no. 38 dan Muslim no. 760)



Bulan yang mendidik umat Islam agar sentiasa memiliki sifat kesabaran yang tinggi terutamanya dalam setiap amalan sepanjang Ramadhan. **Syahrul Shabr (bulan sabar)** adalah bulan yang memberi peluang kepada umat Islam

agar sentiasa berlatih dalam setiap keadaan kerana dalam bulan ini umat Islam diuji dengan kelaparan, maka lapar adalah latihan sabar. Umat Islam diuji dengan dahaga, maka dahaga adalah latihan sabar, umat Islam diuji dengan marah, maka menahan marah adalah latihan sabar. Umat Islam diuji juga dengan perbuatan mengumpat, maka menahan mengumpat adalah juga latihan sabar. Semoga Allah SWT memberi sebanyak-banyak kesabaran dan kekuatan kepada kita sepanjang Ramadhan ini dalam menempuh ujian yang ditakdirkan untuk kita. Firman Allah SWT yang bermaksud:

**“...Sesungguhnya orang-orang yang bersabarlah sahaja yang akan disempurnakan pahala mereka dengan tidak terkira”.** (Surah al-Zumar: 10)

**Sabda Rasulullah SAW: ...Bagi orang yang melaksanakan puasa ada dua kebahagiaan; kebahagiaan ketika berbuka dan kebahagiaan ketika bertemu dengan Rabbnya...** (Riwayat Muslim no.

1151)



Bulan yang membimbing akhlak manusia **tarbiatul khulukiah (bimbingan akhlak)** yang mampu membentuk manusia kepada akhlak yang diredhai oleh Allah SWT. Melalui madrasah Ramadhan manusia dibimbing dalam satu kursus yang singkat, tapi padat dan lengkap sepanjang sebulan Ramadhan.

Hanya mereka yang benar-benar ikhlas beramal sahaja akan berjaya keluar daripada kursus ini dengan akhlak yang cemerlang. Akhlak akan terserlah dengan keindahan tutur kata yang cantik dan tingkah laku yang beradab sopan. Sabda Rasulullah SAW:

**“Barangsiapa yang tidak mampu meninggalkan perkataan dusta dan perbuatan dusta, maka Allah tidak memerlukan lapar dan dahaga mereka.** (Riwayat al-Bukhari no. 1903)

Hadis di atas menjelaskan bahawa seseorang yang berpuasa haruslah menjaga tutur kata dan akhlaknya kerana Allah SWT tidak akan memandang amal puasa seseorang yang bercampur dengan segala perkara yang dimurkaiNya. Semoga madrasah Ramadhan menjadikan kita umat Islam yang baik akhlak dan indah tutur katanya.



Ramadhan adalah bulan **ljtima'iyah (bermasyarakat)**. Umat Islam berpeluang menjadikan bulan Ramadhan sebagai medan untuk memupuk sifat kebersamaan dalam bermasyarakat, bersatu hati dan memupuk nilai kasih sayang sesama manusia. Pada bulan ini umat Islam akan berebut-rebut melakukan sebanyak mungkin ibadat dengan bersedekah, solat terawih

berjemaah, sumbangan iftar dan membantu sesama manusia. Semua amalan ini dijanjikan dengan ganjaran yang sebaik-baiknya di sisi Allah SWT.

Sabda Rasulullah SAW:

**“Barangsiapa yang memberi makan kepada orang yang berbuka puasa maka dia memperoleh pahalanya, dan pahala bagi yang (menerima makanan) berpuasa tidak berkurang walau sedikitpun.”** (Riwayat al-Tirmidzi no. 807)

Sabda Rasulullah SAW:

**Sedekah yang paling utama adalah sedekah pada bulan Ramadhan.** (Riwayat al-Tirmidzi no. 663)



*“Raih Keberkatan Dalam Amalan”*



Ramadhan bulan **tafakur dan tadabbur** (berfikir dan mentelaah). Mari kita bertafakur dan bertadabbur sejenak dimanakah kita apabila hampir tiba Ramadhan. Dalam kesibukan seharian manusia berlumba-lumba mengejar keinginan dunia dan hanya segelintir sahaja yang mengejar akhirat.

Bagi yang bekerja makan gaji akan sibuk menghitung makanan apa yang akan dibeli untuk berbuka puasa. Bagi yang berniaga pula akan sibuk menyenaraikan apakah menu kegemaran masyarakat untuk dijual. Bagi pasangan suami isteri akan sibuk berkira-kira giliran kampung siapa yang mendapat mandat menyambut hari raya pada kali ini. Selain itu, bagi yang bergelar ibu bapa pula sibuk mencari kain untuk dihantar kepada tukang jahit kerana takut tukang jahit tidak menerima tempahan sekiranya lewat hantar.

Adakah semua perkara di atas menjadi keutamaan untuk kita fikirkan apabila datangnya Ramadhan??? Rugilah mereka yang tergolong dalam golongan ini yang sentiasa mengutamakan keinginan hawa nafsu dan kelazatan dunia semata-mata. Sementara satu lagi golongan beruntunglah mereka, iaitu golongan yang sentiasa menanti-nanti kedatangan Ramadhan dengan berlumba-lumba memperbanyakkan amal ibadat. Mereka sentiasa merindui dan ternanti-nanti kedatangan Ramadhan dengan penuh semangat dan keazaman yang tinggi bagi melaksanakan ibadat semaksimum yang mungkin.

Sejak dari awal lagi sebelum masuk Ramadhan mereka akan menyusun jadual ibadat agar tidak terkurang walaupun satu. Hari-hari yang akan dilalui sepanjang Ramadhan akan dihiasi dengan adab-adab dan tutur kata yang penuh tawaduk kepada Allah SWT.

Sabda Rasulullah SAW:

**"Telah datang kepada kamu bulan Ramadhan, bulan yang penuh keberkatan. Allah telah mewajibkan kepada kamu untuk berpuasa padanya. Di bulan ini, akan dibukakan pintu-pintu syurga, dan ditutup pintu-pintu neraka, serta syaitan-syaitan akan dibelenggu. Demi Allah, di bulan ini terdapat satu malam yang lebih baik daripada 1000 bulan. Siapa yang terlepas dari mendapat kebajikannya maka dia telah terhalang dari rahmat Allah SWT".** (Riwayat al-Nasai no. 2106)

*Natijah ...*

Di penghujung madrasah Ramadhan umat Islam akan meraih keputusan berdasarkan amalan dalam diri masing-masing sama ada pada tahap cemerlang, baik, sederhana, lemah ataupun gagal. Semuanya adalah bergantung pada setiap amal ibadat dan perwatakan masing-masing dengan setiap ujian yang telah didatangkan khas oleh Allah SWT sepanjang Ramadhan. Firman Allah SWT:

**"Hai orang-orang yang beriman, diwajibkan atas kamu berpuasa sebagaimana diwajibkan atas orang-orang sebelum kamu agar kamu bertakwa".**  
(Surah al-Baqarah: 183)

Ayat tersebut menunjukkan matlamat sebenar tarbiah Ramadhan kepada umat Islam adalah membentuk manusia yang bertakwa kepada Allah SWT. Adakah kita akan mampu keluar daripada madrasah Ramadhan kali ini dengan nilai takwa yang sebenarnya kepada Allah atau hanya sekadar menahan lapar dan dahaga sahaja? Semoga Ramadhan kali ini menjadikan kita manusia yang mampu meraih keputusan cemerlang dengan nilai takwa yang sebenar kepada Allah SWT. Amin.

### *Doa Agar Dapat Bertemu Ramadhan*

*Dari Anas bin Malik RA berkata:*

**"Nabi SAW apabila tiba bulan Rejab baginda akan berdoa: "Ya Allah berkatilah kami di bulan Rejab dan Sya'ban dan sampaikanlah kami ke bulan Ramadhan".**

(Riwayat Ahmad no. 2228)

**Para Salafussoleh berdoa kepada Allah SWT agar sempat bertemu Ramadhan.**

**Apabila kelihatan anak bulan Ramadhan mereka berdoa dengan berkata:**

**"Allah Maha Besar, Ya Allah anugerahilah kami keamanan, keimanan, keselamatan dan Islam. Limpahkanlah kami taufik seperti yang Engkau sukai dan redhai, Tuhanku dan Tuhan-Mu adalah Allah SWT".**  
(Riwayat al-Tirmidzi no. 3373).



**Ramadan**  
Kareem

# SENTIASA ADA UNTUK MEMBERI

Norhafizah Mohd Ghazali

Dalam mengejar kemewahan hidup, adakala manusia alpa sehingga jarang untuk memberi. Nilai yang banyak terasa disayangi, nilai yang sedikit habisnya dibimbangi. Itulah hakikat kehidupan.

Tidak dinafikan hidup dalam kemewahan menjadi impian kebanyakan insan. Hinggakan ada manusia yang sanggup melakukan apa sahaja demi mengejar kemewahan. Ada juga yang terlalu 'berkira' untuk memberi. Sempena bulan mulia ini marilah sama-sama kita mendidik jiwa untuk sentiasa memberi dan terus memberi apa adanya.



1

## SENYUM

Senyum itu juga sedekah. Tanpa perlu mengeluarkan apa-apa modal dalam bentuk wang ringgit mahupun harta benda, senyum itu amat mudah untuk diukirkan. Senyumlah kepada suami, isteri, anak-anak dan ahli keluarga di sekeliling kita serta sahabat sekerja, malah orang di sekeliling kita. Senyuman mampu mewujudkan rasa bahagia dan tenang dalam jiwa. Senyum juga dapat memupuk kemesraan sesama kita.

Ayuh kita mulakan hari dengan mengukir senyuman penuh keikhlasan. Bagaimana cara untuk membezakan senyuman ikhlas dan senyuman yang dibuat-buat? Senyuman ikhlas kekal terukir lebih lama berbanding senyuman dibuat-buat yang akan hilang serta merta. Fikir-fikirkan!

Oleh itu, cubalah luangkan masa dan tenaga untuk aktiviti-aktiviti sukarela seperti gotong-royong membersihkan kawasan kampung, perumahan, surau, masjid dan sebagainya. Ataupun boleh juga memanfaatkan kepakaran yang ada dengan mengajarkannya kepada yang lain. Mudah juga kan?

4

## KESIMPULAN

Kesimpulannya, setiap dari kita ini mampu memberi. Cuma perlu tanamkan azam dalam diri untuk terus memberi mengikut kemampuan masing-masing. Sabda Rasulullah SAW:

*"Jagalah dirimu daripada api neraka meskipun hanya bersedekah separuh daripada sebiji kurma. Jika tidak dapat (bersedekah dalam bentuk material), maka dengan perkataan yang baik."*

(Riwayat al-Bukhari no. 6539 dan Muslim no. 1016)

2

## SALAM

Sama-samalah kita hidupkan amalan memberi salam sama ada di rumah mahupun di tempat kerja. Didiklah anak-anak untuk memberi salam ketika keluar dan masuk ke dalam rumah. Ajaklah rakan-rakan amalkan memberi salam ketika bertemu dan berpisah. Ucapan salam adalah mengucapkan kesejahteraan ke atas individu berkenaan. Marilah kita sama-sama mengucapkan salam dengan lafaz terbaik "Assalamualaikum warahmatullahi wabarakatuh". Salam juga dapat mengeratkan hubungan silaturrahim sesama ahli keluarga dan juga rakan sekerja. Ayuh mula amalkan!



# DIRI

**Senyum itu juga sedekah.** Tanpa perlu mengeluarkan apa-apa modal dalam bentuk wang ringgit mahupun harta benda!

**Ucapan salam dapat mengeratkan hubungan silaturrahim** sesama ahli keluarga dan juga rakan sekerja. **Ayuh mula amalkan!**

3

## SEDEKAH

Sedekah bukan hanya dalam bentuk wang ringgit dan harta benda. Bagi yang miskin harta benda mungkin tidak mampu untuk mengeluarkan semua itu, tetapi masih juga dapat memberi. Malah mungkin yang miskin juga terasa untuk memberi. Maka memberi manfaat juga amatlah mudah sama ada dalam bentuk tenaga, masa, ilmu dan kepakaran yang dimiliki atau kata-kata yang baik. Mungkin bagi golongan sederhana, apa yang ada cuma 'cukup-cukup makan' sahaja.

*"Raih Keberkatan Dalam Amalan"*



# PERMATA YANG DITINGGALKAN

Zuraiha Mohd Zain

Berdebar rasa hatiku menanti kedatangan Ramadhan kali ini... Entah mengapa? Aku pun tidak tahu..Mungkin kerana aku sedang diuji Allah dengan pemergian adindaku pada tanggal 4 Rejab 1439H/ 22 Mac 2018 yang lalu. *Al- fatihah*... Arwah meninggalkan seorang isteri dan dua orang anak perempuan yang masih bersekolah. Kakak akan menghadapi peperiksaan SPM, manakala adik pula akan menduduki UPSR.

## Menggalas Amanah

Rasa berdebar ini ada kaitan dengan tanggungjawabku sebagai pemegang amanah menjaga anak-anak arwah. Sudah pastinya anak-anak buahku ini akan terasa kehilangan seorang bapa bila tibanya Ramadhan nanti... *Allahhu Akbar!* Anak yatim amat sinonim dengan bulan Ramadhan. Apa tidaknya, mereka akan dilayan dengan istimewa setiap kali tibanya bulan yang mulia ini. Kita sentiasa mendapat *info* melalui kaca televisyen atau di media sosial orang-orang kaya yang pemurah meraikan anak-anak yatim berbuka puasa di hotel mewah. Alhamdulillah dan syukur kerana rakyat Malaysia masih prihatin dengan takdir yang tertulis terhadap anak-anak yatim ini. Gelaran anak yatim adalah anugerah Allah terhadap hamba-hambanya yang terpilih sahaja. Al-Quran berulang kali menyebut perkataan 'yatim' dan penggunaan kata-kata yatim itu merujuk kepada kemiskinan dan kepapaan. Ertinya mereka yang berada dalam golongan yatim (anak yatim) memerlukan perhatian dan pembelaan daripada masyarakat untuk membolehkan mereka menjalani kehidupan sempurna seperti orang lain yang mempunyai penjaga (ayah atau ibu).

## Menyantuni anak yatim

Sesungguhnya Islam adalah agama yang sangat prihatin terhadap kesejahteraan umatnya, terutama nasib golongan yang lemah seperti orang miskin, ibu tunggal dan anak yatim. Sehubungan itu, Allah SWT memerintahkan kepada NabiNya dengan firmanNya dalam surah Ad-Dhuha ayat 9 yang bermaksud "**Adapun terhadap anak yatim, maka janganlah engkau berlaku sewenang-wenangnya.**" Sesiapa yang berlaku tidak baik atau bersikap zalim terhadap anak yatim pasti akan menerima balasan daripada Allah SWT dan golongan ini dianggap antara satu ciri orang yang mendustakan hari akhirat. Firman Allah SWT yang bermaksud "**Tahukah kamu (orang) yang mendustakan agama (hari pembalasan)? Itulah orang yang mengherdik anak yatim, dan tidak mendorong memberi makan orang miskin.**" (Surah Al-Ma'un: 1-3)

Dalam konteks bersedekah kepada anak yatim ini boleh dilakukan dari segi fizikal, mental dan spiritual. Memenuhi keperluan fizikal anak yatim bermaksud kita memberi sedekah dalam bentuk harta benda contohnya memberi makanan dan juga pakaian. Sedekah untuk memenuhi keperluan mental iaitu menyayangi mereka seperti menyayangi anak kita sendiri. Spiritual pula kita memberi pendidikan yang sempurna baik dari segi akhlak, ibadat dan akidahnya. Keutamaan bersedekah adalah lebih digalakkan pada bulan Ramadan berbanding bulan-bulan lain. Apakah keistimewaannya bersedekah pada bulan ini? Amalan sedekah ini sangat dituntut kerana bulan ini juga digelar bulan sedekah.

## Ganjaran

Ganjaran yang sangat besar malahan berlipat kali ganda pahalanya jika kita tidak lepaskan peluang bersedekah kepada orang yang memerlukan seperti anak-anak yatim ini. Sebagaimana dijelaskan oleh Rasulullah SAW dalam sebuah hadis jika kita menunaikan perkara-perkara sunat dalam bulan Ramadhan dikira melakukan perkara fardhu di bulan yang lain. Manakala, melaksanakan satu kefardhuan sepanjang bulan ini, adalah seolah-olah melakukan 70 kefardhuan pada bulan lain. Sedekah akan lebih efektif jika diberikan kepada sasaran yang tepat dan masa yang sesuai. Di samping itu, mereka yang bersedekah ini, Allah SWT janjikan syurga dan merupakan pendinding daripada api neraka. Amalan ini juga dapat menjinakkan hati kita sekaligus membuang sifat sombong yang wujud di dalam diri. Sabda Nabi SAW yang bermaksud "**Sesiapa yang sanggup melindungi dirinya daripada api neraka walaupun dengan (bersedekah) separuh buah kurma, maka hendaklah dia lakukan**" (Riwayat Muslim no. 1016). Begitulah betapa besarnya kelebihan yang akan diperolehi oleh mereka yang bersedekah.

## Hulurkan Sedekah

Selain itu, bersedekah juga dianjurkan kepada orang lain, sama ada individu atau kumpulan, institusi yang memberikan kita pendidikan serta tidak ketinggalan institusi kebajikan yang sentiasa memerlukan bantuan dan sumbangan para dermawan.

la berdasarkan firman Allah SWT dalam surah al-Balad ayat 15 yang bermaksud "**(kepada) anak yatim yang ada hubungan kerabat**" Janganlah kita jadikan amalan bersedekah ini bermusim.... selepas habis Ramadhan kita jadi orang yang tamak dan kedekut pula. Kedekut dan sayang dengan harta yang kita usahakan dengan titik peluh sendiri, takut habis jika sedekah. Sebenarnya Ramadhan adalah akademi latihan untuk umat Islam mempraktikkan diri menjadi lebih baik. Cukuplah 30 hari Allah sediakan latihan untuk kita. Jika *istiqamah* betul-betul pasti tidak rugi. Hasilnya nanti akan kita tuai di alam barzakh yang sudah pastinya akan menjadi tempat persinggahan kita sementara menanti alam akhirat yang kekal abadi di sana selamanya. Moga setiap amalan sedekah kita yang diniatkan ikhlas kerana Allah diterima di sisiNya. Akhir kata, Ahlan Ya Ramadhan! Kami menanti kedatanganmu dengan penuh rasa debaran...



# JADIKAN RAMADHAN BULAN BERJIMAT

Razak Nordin



Saya terkesan dengan satu tazkirah Ramadhan beberapa tahun lalu di Masjid Saidina Omar Kampung Padang, Kuantan, Pahang tentang pembaziran makanan yang berlaku sepanjang Ramadhan sehingga bertan-tan banyaknya. Saya ingat-ingat lupa jumlah yang disebut oleh penceramah tersebut. Lalu untuk menambahkan kepercayaan saya terhadap fakta tersebut, saya telah *google* di internet untuk memastikan kesahihannya.

## Pembaziran

Memang mengejutkan. Fakta ini yang saya dapat dari Kajian Perbadanan Pengurusan Sisa Pepejal dan Pembersihan Awam (SWCorp) menunjukkan sepanjang Ramadhan setiap tahun, rakyat di negara ini membuang 270,000 tan makanan yang 'tidak diusik' dan boleh dimakan semula sudah tentu mengejutkan.

Apa lagi bila digambarkan jika disusun, longgokan makanan ini bersamaan dengan ketinggian 30 bangunan KLCC yang setinggi 452 meter.

Inilah hanya nasihat yang sederhana, yang bermula daripada 'tragedi' di atas.

Kalaulah ini suatu nasihat, paling utama, saya tujukan untuk diri saya sendiri agar Ramadhan ini menjadi lebih baik daripada Ramadhan-Ramadhan sebelumnya.

## Berpada-pada

Sepatutnya Ramadhan memberi peluang untuk kita lebih berjimat cermat. Maksud saya, jimat dari segi perbelanjaan harian. Yalah, masa makan yang biasanya enam kali atau lebih sehari sudah bertukar menjadi hanya dua kali sehari iaitu waktu berbuka dan sahur sahaja.

Kalaulah waktu berbuka dijadikan sebagai masa untuk membalas dendam serta mengqadha makan-makan yang terpaksa ditinggalkan pada sebelah siang, mungkin ada sedikit kekeliruan sederhana yang berlaku di situ.

Pertamanya, pada saya, perut kecil yang sama mana mungkin dapat menampungnya sekaligus. Sarat muatan selalunya banyak membawa risiko kurang baik sama ada kepada diri sendiri dan juga 'pengguna-pengguna' lain. Keduanya, mungkin ada hikmah-hikmah puasa yang perlu diperhalusi lagi agar ibadat puasa itu mencapai hikmah yang dikehendaki oleh PENYURUHNYA. Bukan sekadarnya sahaja.

## Ironi .....

Namun ironinya, ia tidak begitu.

Rasa saya, semua orang ada banyak pengalaman-pengalaman sendiri pada Ramadhan-Ramadhan yang sebelumnya. Mungkin juga pengalaman-pengalaman orang lain yang telah dikongsi sama ada secara langsung ataupun tidak langsung. Mungkin juga dari pemerhatian secara tidak langsung.

Rambang mata serta rambang nafsu, selalunya menyebabkan kita hilang perkiraan untuk membezakan antara kemahuan dan keperluan. Kalau ikutkan rambang mata dan rambang nafsu, semuanya kita mahu. Soalnya adakah semua yang mata dan nafsu kita mahukan itu, merupakan keperluan kita sebenarnya.

## Bersederhanalah

Contoh yang sederhana, kalaulah hanya ada dua perut yang perlu diisi, adakah wajar kita menggunakan kesepuluh-sepuluh jari untuk membimbit plastik-plastik makanan yang dibeli di bazar-bazar Ramadhan atau di mana-mana sahaja. Itu tidak termasuk yang dibimbit oleh suami atau isteri serta anak-anak. Ini antara realiti masa lalu yang sudah menjadi pengalaman kita bersama kalaupun tidak semuanya.

Payah untuk menafikan, kalaulah sekarang ini kita berumur 40 tahun, bermakna sudah kurang lebih 25 tahun kita melepasi umur baligh dari segi matematikanya. Dan kalaulah tempoh itu diambil kira sebagai suatu perbandingan, selama itulah juga kita sudah bertukar silih sahabat-sahabat dan betapa banyaknya pengalaman yang kita kutip bagi menjelaskan maksud di atas.

## Sudah-sudahlah


Kadangkala, kita jarang belajar dari pengalaman hari semalam, dimana sebahagian makanan yang dibeli untuk dijadikan juadah berbuka puasa, namun akhirnya bakul sampah juga yang kenyang. Dan hari ini kita mengulangi lagi kesilapan semalam sehinggalah Ramadhan berakhir.

Yang sudah tu, sudahlah. Muslim yang baik, InshaAllah tidak akan disengat dua kali pada tempat yang sama. Itu antara nasihat Rasul SAW.

Mari, kita mulakan hari ini, pada Ramadhan kali ini.

**270,000 tan makanan yang 'tidak diusik' dan boleh dimakan semula sepanjang Ramadhan**

Jika disusun, longgokan makanan ini **bersamaan dengan ketinggian 30 bangunan KLCC yang setinggi 452 meter.**



# 9

## TIPS TIDAK TIDUR SELEPAS BERSAHUR

Roshadah Abu Bakar

1

Melewatkan sahur

Makan sahur tidak terlalu awal (jarak yang terlalu jauh dengan masuk waktu subuh). Situasi ini akan menjadikan kita mengantuk dan menyebabkan kita berniat untuk sambung tidur semula. Zaid bin Tsabit meriwayatkan bahawa: **"Kami pernah makan sahur bersama Rasulullah SAW. Kemudian kami pun berdiri untuk menunaikan solat. Kemudian Anas bertanya pada Zaid, "Berapa lama jarak antara azan subuh dan sahur kamu?" Zaid menjawab, "sekadar membaca 50 ayat".** (Riwayat Muslim no. 1097)

2

Solat berjemaah

Merancang solat subuh berjemaah bersama keluarga atau kawan-kawan.

3

Manfaatkan masa yang ada

Mengisi kegiatan yang bermanfaat selepas selesai bersahur dan solat subuh dengan aktiviti yang melibatkan orang ramai seperti aktiviti tadarus berkumpulan atau pengajian kitab berkumpulan dan sebagainya.

4

Tonton rancangan ilmiah

Menonton rancangan yang mendidik jiwa seperti slot muhasabah, tazkirah dan sebagainya. Pengisian masa dengan rancangan mendidik jiwa ini secara tidak langsung dapat mengelakkan 'beratnya' mata setelah bersahur. Sekaligus menambah ilmu pengetahuan.

5

Pilih menu sahur yang sesuai

Bersederhana dalam memilih makanan dan makan makanan yang kurang lemak, berminyak, pedas dan sebagainya. Makanan berlemak akan melambatkan proses penghadaman dan menjadi penyumbang kepada rasa mengantuk, ditambah pula suasana dingin awal pagi.

6

Elak makan terlalu banyak

Sebolehnya elakkan makan terlalu banyak sehingga menyebabkan kita kurang selesa selepas bersahur. Makan terlalu banyak ketika sahur bukan sahaja menyebabkan mengantuk, malahan akan memberi kesan kepada rasa malas untuk melaksanakan aktiviti seharian. Janganlah sesekali menjadikan puasa sebagai alasan untuk tidak produktif dalam kerja kita.

7

Aktiviti keluarga

Merancang aktiviti bersama keluarga selepas bersahur seperti bergotong-royong mengemas rumah, senaman ringan atau keluar berjalan-jalan melihat keindahan alam di waktu pagi.

8

Jauhi dari faktor 'penarik'

Elakkan diri daripada melalui kawasan yang menjadi penarik untuk tidur seperti katil, sofa dan lain-lain.

9

Segarkan badan

Mandi awal pagi agar tubuh badan jadi segar dan cergas.

# BERPUASA, TAPI TIDAK SOLAT

Roshadah Abu Bakar



## RAMADAN Mubarak

**DUKACITA** dan teramat malang jika ada yang sanggup berpuasa tetapi meninggalkan solat. Anggapan bahawa puasa lebih penting berbanding solat perlu diperbetulkan segera. Golongan ini hanya melakukan ibadat puasa sahaja manakala ibadat solat diabaikan. Firman Allah SWT yang bermaksud:

*"Kemudian mereka digantikan oleh keturunan-keturunan yang mencuaikan solat serta menurut hawa nafsu (dengan melakukan maksiat) maka mereka akan menghadapi azab (dalam neraka)."* (Surah Maryam: 59)

Firman Allah SWT yang bermaksud:

*"...dan dirikanlah solat, sesungguhnya solat itu mencegah dari perbuatan keji dan mungkar..."* (Surah al-Ankabut: 45)

### TUNTUTAN SOLAT

Solat lima waktu adalah tuntutan utama yang wajib dilaksanakan oleh semua umat Islam yang telah cukup syaratnya. Solat merupakan rukun Islam kedua selepas ucapan syahadah, manakala puasa pula merupakan rukun Islam yang ketiga dalam Islam. Rasulullah SAW bersabda:

*"Tonggak urusan agama adalah Islam, dan tiang agamanya adalah solat".* (Riwayat al-Tirmidzi no. 2559 [Hasan Sahih]).

### HUKUM MENINGGALKAN SOLAT

Seseorang yang meninggalkan solat sebab **sengaja kerana menafikan kewajipan solat** maka sepakat para ulama' telah menghukumkannya kufur dan murtad kerana mengingkari kewajipan dalam rukun Islam yang lima. Rasulullah SAW bersabda:

*"Pemisah antara seorang muslim dengan kekafiran dan kesyirikan adalah meninggalkan solat."* (Riwayat Muslim no. 82).

Sabda Rasulullah SAW:

*"Perjanjian antara kami dan mereka (orang kafir) adalah mengenai solat, barangsiapa meninggalkannya, maka dia telah kafir."* (Riwayat al-Tirmidzi no. 2621)

Orang yang tidak menunaikan solat lima waktu tidak sah puasanya, bahkan ibadahnya yang lain seperti zakat, haji, sedekah dan amal solehnya yang lain juga tidak sah sehinggalah ia bertaubat kepada Allah dan kembali mengerjakan solat.

Seseorang yang meninggalkan solat sebab **malas (masih mengakui kewajipan solat cuma malas untuk mendirikan solat)** maka dia adalah fasiq. Menurut jumhur ulama' golongan ini tidaklah dihukum kafir, tetapi telah melakukan dosa yang amat besar.

### PUASA ORANG YANG TIDAK SOLAT

Puasa golongan ini adalah sah, jika ia memenuhi rukun puasa yang ditetapkan dan tidak melakukan sebarang perkara yang membatalkan puasa. Dia juga tidak dituntut untuk mengqadhakan (menggantikan) puasanya, tetapi yang menjadi persoalannya, adakah Allah SWT menerima ibadat puasanya sedangkan dia telah mengabaikan ibadat yang cukup besar dalam Islam iaitu solat?... Menurut jumhur ulama' tidak semua ibadat yang sah diterima oleh Allah SWT. Contohnya, seseorang yang menunaikan solat dengan riya' maka solatnya adalah sah apabila cukup syarat dan rukunnya, namun solatnya tidak diterima oleh Allah SWT kerana solatnya disebabkan riya' dan menunjuk-nunjuk. Rasulullah SAW pernah bersabda:

*"Sesiapa yang tidak meninggalkan kata-kata dusta dan melakukan pendustaan, maka Allah SWT tidak memerlukan ia meninggalkan makanan dan minumannya".* (Riwayat al-Bukhari no. 1804).

Berdasarkan hadis di atas Allah SWT tidak menerima puasanya jika dengan akhlak mazmumah (buruk), maka berlebih lagilah kalau meninggalkan solat yang dosanya amatlah besar, berkali ganda lebih besar dari dosa kerana berakhlak dengan akhlak mazmumah.

### NILAI AMALAN SOLAT

Begitu tingginya nilai perhitungan Allah SWT kepada amalan solat seseorang. Sekiranya baik amalan solatnya, maka baiklah semua amalannya. Namun sekiranya buruk amalan solatnya, maka buruklah balasannya. Dari Abu Hurairah RA bahawa Rasulullah SAW bersabda:

*"Sesungguhnya amal yang mula-mula sekali dihisabkan seseorang pada hari kiamat ialah solatnya, jika solatnya diterima maka sesungguhnya beruntung dan berjajalah ia, dan jika solatnya tidak diterima maka kecewa dan rugilah dia".* (Riwayat al-Tirmidzi no. 413).

Semoga kita tidak termasuk dalam golongan yang malang dan rugi ini kerana setiap amal baik di dunia tidak diterima oleh Allah SWT selagi mana tidak bertaubat dan segera mendirikan solat.

**Dalam Islam, sekiranya ibadat solat ditinggalkan dengan sengaja, maka seluruh amalan yang lain akan ditolak dan tidak diterima. Maka rugilah bagi sesiapa yang meninggalkan solat.**

*"Raih Keberkatan Dalam Amalan"*

# QADHA DAN FIDYAH

Norhafizah Mohd Ghazali

## DEFINISI

**QADHA PUASA** ialah menggantikan puasa. Menurut Ustaz Sulaiman Endut di dalam buku Asas-asas Fardu Ain, qadha puasa wajib dikerjakan bagi menggantikan puasa Ramadhan yang ditinggalkan kerana sakit, musafir, haid, nifas, bersalin dan sebagainya. Bilangan hari untuk mengqadha puasa adalah mengikut bilangan yang ditinggalkan tanpa gandaan walaupun melangkaui Ramadhan seterusnya.

**FIDYAH PUASA** ialah amalan memberikan sedekah kepada fakir miskin dengan secupak beras (600 g- menurut *Kitab Fiqh al-Manhaji*) bagi sehari berbuka puasa mengikut syarat-syaratnya. Fidyah puasa akan berganda apabila melangkaui Ramadhan berikutnya. Hal ini seperti mana dinyatakan dalam *Kitab Fiqh al-Manhaji* iaitu "Perkara ini (fidyah) bertambah dengan bertambahnya tahun".

fidyah mengikut bilangan hari yang ditinggalkannya. Jika dia tidak dapat qadha puasa kerana uzur iaitu sakitnya berterusan hingga masuk Ramadhan berikutnya, dia tidak diwajibkan membayar fidyah tetapi perlu mengqadha puasa sahaja. Inilah seperti yang dijelaskan di dalam *Kitab Fiqh al-Manhaji*.

Menurut Dr. Yusuf al-Qaradhawi, sakit sementara yang ada harapan untuk sembuh tidak diharuskan membayar fidyah tetapi diqadha sahaja puasa yang ditinggalkan itu. Bagi sakit yang lama dan tiada harapan sembuh pula, dikenakan fidyah. Mengikut sesetengah imam, seperti Abu Hanifah, fidyah harus dibayar dengan duit kepada fakir miskin dan orang-orang yang memerlukannya.

## ORANG UZUR/ SAKIT

Orang yang **terlalu tua serta orang sakit yang tidak ada harapan untuk sembuh** tidak diwajibkan berpuasa malah diharuskan berbuka. Ini kerana puasa hanya wajib ke atas individu yang mampu melakukannya. Al-Bukhari (4235) meriwayatkan daripada Atho' katanya Ibnu Abbas RA mendengar ayat al-Quran yang dibacakan yang bermaksud: "**Dan wajib atas orang-orang yang tidak berdaya berpuasa (kerana tua dan sebagainya) membayar fidyah (dengan) memberi makan orang-orang miskin**" (Surah al-Baqarah: 184) Ibnu Abbas berkata: "Ayat ini tidak *dimansuhkan*. Ia ditujukan kepada orang lelaki dan perempuan yang terlalu tua dan tidak mampu berpuasa. Mereka hendaklah memberi makan kepada seorang miskin bagi setiap hari yang ditinggalkan". Jelas di sini bahawa orang yang terlalu tua dan tidak mampu berpuasa serta orang sakit yang tiada harapan untuk sembuh dibolehkan berbuka puasa dan bersedekah pada setiap hari yang ditinggalkan dengan secupak makanan asasi iaitu dikenali juga sebagai *fidyah*.

Orang **sakit yang masih mempunyai harapan untuk sembuh** pula, diwajibkan ke atasnya untuk mengqadha puasa Ramadhan yang ditinggalkan sebelum datangnya bulan Ramadhan tahun berikutnya. Namun, jika dia sengaja melengah-lenghakkannya sehingga berlalu Ramadhan seterusnya, maka dikenakan qadha berserta

## QADHA PUASA

### Menggabungkan puasa qadha dan puasa 6

Ulama mempunyai pandangan berbeza-beza mengenai hal ini. Ada pendapat yang membolehkan dan ada pendapat yang tidak membolehkan digabung puasa qadha dan puasa enam. Masing-masing mempunyai hujah yang tersendiri.

Menurut Dr. Zulkifli Mohamad al-Bakri, pendapat yang lebih kuat ialah tidak boleh disekalikan puasa ganti bersama puasa sunat Syawal. Ini disebabkan kerana terdapat syarat berlaku pertindihan 2 ibadat iaitu seperti yang disebutkan oleh Ibnu Rajab al-Hanbali di dalam kitab *Qawaidnya*:

**"Apabila berhimpun dua ibadah dari jenis yang sama dan salah satu daripadanya bukanlah dilakukan secara qadha dan juga bukan secara ikutan, maka dibolehkan berlaku pertindihan antara kedua-duanya dan cukup hanya dengan satu perbuatan sahaja".**

Menurut Syekh Muhammad Nuruddin Marbu al-Banjari al-Makki, puasa qadha harus didahulukan berbanding puasa sunat Syawal. Walaubagaimanapun boleh dilakukan kedua-duanya sekali iaitu puasa enam hari di bulan Syawal dengan niat puasa qadha jika dilakukan pada bulan Syawal.

## Info

**Qadha: ganti**

**Fidyah: memberi sedekah secupak beras atau makanan asasi kepada fakir miskin**

**Musafir: perjalanan yang melebihi 2 marhalah**

**Haid: Darah semulajadi yang keluar dari wanita dewasa**

**Nifas: Darah yang keluar selepas melahirkan anak**





### TIDAK SEMPAT QADHA PUASA HINGGA TIBA RAMADHAN BERIKUTNYA

Fidyah dikenakan bagi mereka yang tidak dapat mengqadha puasa sehingga masuk Ramadhan berikutnya. 1 cupak beras dikenakan untuk 1 hari yang ditinggalkan. Jika puasa tidak diqadha sehingga melangkaui 2 tahun, maka fidyah akan berganda menjadi 2 cupak untuk 1 hari yang ditinggalkan. Begitulah seterusnya. Namun puasa tetap juga perlu diganti mengikut hari yang ditinggalkan (tiada gandaan).

### MENINGGAL SEBELUM QADHA

Menurut Syeikh Muhammad Nuruddin Marbu al-Banjari al-Makki, **orang yang tidak sempat menggantikan puasa qadha atau puasa nazar sebelum meninggal dunia**, ahli warisnya boleh melakukan salah satu perkara sama ada mengqadha puasa si mati ataupun membayar fidyah.

Menurut Dr. Zulkifli Mohamad al-Bakri, sekiranya si mati mampu menggantikan puasa namun sengaja melenghakkannya, maka puasanya perlu diganti dengan fidyah dan diuruskan oleh walinya. Bagi mereka yang tidak sempat mengqadha puasa iaitu meninggal semasa Ramadhan itu, dan puasa yang ditinggalkan adalah kerana keuzuran yang menghalang daripada berpuasa, maka dia tidak dikenakan apa-apa qadha atau fidyah.

### QADHA PUASA OLEH WALI/ KERABAT

Mengenai qadha puasa yang dilakukan oleh wali atau kaum kerabat si mati pula, tidak sah puasa tersebut menurut pendapat al-Syafie dan kebanyakan ulama, ahli hadis, Abi Thaur dan al-Auza'ie. Hanya wajib mengambil harta pusaka untuk membayar fidyah dengan setiap hari secupak makanan asasi.

Berlainan pula dengan pendapat Imam al-Nawawi dalam *Tashih al-Tanbih* yang menyatakan wali sunat berpuasa bagi si mati sekiranya dia meninggal dunia sebelum sempat menggantikannya. Yang dimaksudkan dengan wali ini ialah kaum kerabat atau waris si mati sama ada yang berhak menerima pusaka atau tidak.

### IBU MENGANDUNG / SUSUKAN ANAK

Jika ibu mengandung atau menyusukan anak berbuka puasa **kerana bimbang tentang diri dan anaknya**, maka dia perlu mengqadha puasa dan membayar fidyah sebelum tiba bulan Ramadhan berikutnya. Tetapi jika ibu **berbuka puasa kerana khawatir tentang dirinya sahaja**, maka dia perlu mengqadha puasa sahaja tanpa perlu membayar fidyah. Inilah pendapat kebanyakan ulama termasuklah Syeikh Muhammad Nuruddin Marbu al-Banjari al-Makki. Juga dinyatakan dalam *Kitab Fiqh al-Manhaji*.



# *RAMADHAN, SESEKALI TERINGAT ..*

Ainul Farhaan Harun

## **Sesekali.. teringat memori Ramadhan dulu-dulu,**

*Rindu pada irama senduk dan kualiti tanda sibuknya emak menyiapkan juadah untuk anak-anak bersahur..*

*Rindu pada bau wanginya tumisan lauk-pauk hasil air tangan insan tercinta..*

*Rindu pada suara tegas ayah yang tidak pernah jemu mengejutkan kami untuk bersahur..*

## **Sesekali.. teringat memori Ramadhan dulu-dulu,**

*Bila ada yang dipercik air lantaran malasnya untuk meninggalkan tilam empuk dan enaknyanya lena..*

*Bila ada yang masam mencuka bila tiada lagi tempat 'VIP' di meja makan untuk bersahur... dan akhirnya bersimpuh di hamparan tikar bersimpuh bersila..*

*Bila ada yang menjeling kerana tidak puas hati bila menu idaman telah menjadi milik orang lain..*

*Bila ada yang dicubit mak, dijentik ayah lantaran suka menyakat adik tika dinihari dan keheningan sahur...*

## **Sesekali.. teringat memori Ramadhan dulu-dulu,**

*Tatkala mak mula sibuk di dapur memasak juadah santapan berbuka..*

*Tatkala ayah menjinjing bungkusan air tebu untuk menghilangkan keringnya tekak seharian berpuasa..*

*Tatkala terukirnya senyuman ayah bersama bungkusan bubur lambuk, makanan wajib di bulan mulia ini..*

*Tatkala 'perang dingin' dan masam mencuka kerana terpaksa sekali lagi berbuka di hamparan tikar mengkuang, gagal mendapatkan tiket 'seat' VIP..*

## **Sesekali.. teringat memori Ramadhan dulu-dulu,**

*Kini, semuanya telah dewasa, menggalas tanggungjawab sendiri*

*Kini, tiada lagi senyum ayah bersama air tebu mahupun bunga api*

*Kini, tangan lincah emak kian tua dan lesu*

*Kini, sesekali sahaja kembali riuh dan meriah suasana sahur*

**Kerana,**

*Masing-masing sudah ada tanggungjawab sendiri*

*Menggalas tugas menyediakan juadah sama seperti emak lakukan dahulu*

*Begitu roda hidup berputar. Semoga madrasah Ramadhan akan terus memberi memori indah untuk diingati*

*Semoga emak dan ayah kita sentiasa dalam rahmat Allah...*

# SAMBUTAN HARI RAYA MENURUT SUNNAH NABI SAW

Mohd Hanafi Jusoh

Setiap agama di dalam dunia ini mempunyai hari-hari kebesaran tertentu yang disambut oleh penganutnya yang mana mempunyai kelebihan tertentu menurut kepercayaan agama masing-masing. Begitu juga dengan Islam. Nabi SAW di dalam hadis yang diriwayatkan oleh Anas bin Malik RA:

**“Ketika Nabi SAW datang ke Madinah, penduduk Madinah memiliki dua hari raya untuk bersenang-senang dan bermain-main di masa jahiliyah. Maka Baginda SAW berkata, “Aku datang kepada kalian dan kalian mempunyai dua hari raya di masa Jahiliyah yang kalian isi dengan bermain-main. Allah telah mengganti keduanya dengan yang lebih baik bagi kalian, iaitu hari raya Idul Fitri dan Idul Adha (hari Nahr)”**

(Riwayat Al-Nasai no. 1556 dan Ahmad 3: 178, disahihkan oleh Syaikh Syu’aib Al Arnauth). Dengan itu kita fahami bahawa sambutan hari raya ini merupakan suatu tuntutan yang dianjurkan oleh agama yang sudah pasti mempunyai adab dan disiplin tertentu dalam meraikannya. Berikut merupakan beberapa adab yang dianjurkan oleh Islam berdasarkan sunnah Nabi SAW ketika mana umat Islam menyambut dan merayakan hari raya:

## 1. Mandi Sebelum Keluar Menunaikan Solat Hari Raya

Imam Malik RA meriwayatkan sebuah hadis di dalam al-Muwatto’ yang bermaksud: *“Sesungguhnya Abdullah bin Umar akan mandi pada pagi Hari Raya Al-Fitri sebelum beliau keluar ke tempat solat hari raya.”* Al-Imam al-Nawawi menyebut para ulama telah bersepakat atas sunatnya mandi untuk solat hari raya.

## 2. Makan Sebelum Keluar Untuk Menunaikan Solat Aidilfitri

Makan sebelum keluar untuk menunaikan solat Hari Raya Aidilfitri dan untuk Aidiladha makan selepas solat. Termasuk di dalam adab berhari raya Aidilfitri ialah makan dahulu sebelum keluar untuk menunaikan solat hari raya. Ini berdasarkan hadis yang diriwayatkan oleh al-Imam al-Bukhari daripada Anas bin Malik katanya: *“Sesungguhnya Rasulullah SAW tidak keluar pada pagi Hari Raya Al-Fitri, sehinggalah Baginda makan terlebih dahulu beberapa biji tamar... dan baginda memakannya dalam jumlah yang ganjil.”* [Riwayat al-Bukhari no. 953]. Sekiranya tidak ada tamar, makanlah sesuatu yang harus dimakan.

## 3. Bertakbir Pada Hari Raya

Takbir hari raya adalah termasuk sunnah yang agung berdasarkan firman Allah SWT yang bermaksud: *“...Dan hendaklah kamu mencukupkan bilangannya dan hendaklah kamu bertakbir mengagungkan Allah atas petunjukNya yang diberikan kepada kamu, supaya kamu bersyukur.”* [Surah al-Baqarah: 185]. Bertakbir pada pagi hari raya ketika keluar dari rumah menuju ke tempat mendirikan solat dan sehingga keluarnya Imam adalah suatu perkara yang benar-benar masyhur di sisi generasi Salaf.

**Waktu bertakbir bagi Hari Raya Aidilfitri** ialah bermula pada malam raya iaitu setelah tenggelamnya matahari pada hari akhir Ramadhan sehingga masuknya imam ke tempat solat untuk solat hari raya.

## 4. Ucapan Tahniah Pada Hari Raya

Termasuk dalam adab berhari raya ialah menyampaikan ucap tahniah sesama muslim dengan sebarang ucapan yang baik seperti ucapan: 1. *تَقَبَّلَ اللهُ مِنَّا وَمِنْكُمْ* – Semoga Allah menerima (amalan) dari kami dan anda semua. 2. *عِيدٌ مُبَارَكٌ* – (Selamat) hari raya yang diberkati. Atau ucapan yang seumpama dengan di atas yang terdiri dari ungkapan-ungkapan tahniah yang dibenarkan. Jubair bin Nufair berkata: “Para sahabat Nabi SAW apabila mereka bertemu sesama mereka pada hari raya mereka mengucapkan *تَقَبَّلَ اللهُ مِنَّا وَمِنْكُمْ*, Ibnu Hajar berkata: Isnad (riwayat ini) Hasan. [Fath al-Bari: 2/446].

## 5. Berpakaian Baru/ Cantik Di Hari Raya

Daripada Jabir RA katanya: “Nabi SAW mempunyai satu jubah yang baginda akan memakainya untuk dua hari raya dan hari Jumaat.” [Sahih Ibnu Khuzaimah: 1765]. Memakai pakaian cantik pada hari raya ini adalah untuk kaum lelaki. Adapun untuk kaum wanita mereka boleh mengenakan pakaian yang biasa (di sebelah luar/ atasnya) seperti sabda Nabi SAW: *“Jangan kamu tegah hamba perempuan Allah dari masjid Allah, tetapi hendaklah kaum wanita keluar dalam keadaan meninggalkan wangian”* [Riwayat Ahmad dan Abu Daud “Sahih”].

Keluar dengan berpakaian biasa di luar dan tidak bertabarruj (berhias) dan mengenakan wangian yang boleh dihidu baunya oleh lelaki ajnabi. Sekiranya wanita berkumpul dalam kelompok mereka sahaja tidak mengapa untuk berpakaian cantik.



## 6. Keluar Ke Tempat Solat Melalui Jalan Lain Dan Balik Jalan Lain

Daripada Jabir bin Abdillah RA katanya: "Adalah Nabi SAW, pada hari raya baginda membezakan jalan (pergi dan balik dari solat hari raya)." [Riwayat al-Bukhari no. 986]

## 7. Solat Hari Raya

Para ulama berbeza pendapat tentang hukum solat hari raya. Sebahagian mengatakan hukumnya **sunat muakkad**, sebahagian yang lain mengatakannya **fardhu kifayah** dan sebahagian yang lain mengatakan hukumnya adalah **fardhu ain (wajib)**, berdosa bagi sesiapa yang meninggalkannya. Inilah pendapat Mazhab Imam Abu Hanifah, pendapat ini dipilih juga oleh beberapa orang ulama' semasa. Disunatkan menyegerakan solat hari raya selepas terbitnya matahari. Ibnu Hajar al-Asqalani di dalam Fath al-Bari menukilkan perkataan Ibnu Battal (ابن بطال): "Telah sepakat para fuqaha' bahawa solat hari raya tidak dilaksanakan sebelum atau ketika terbit matahari, sebaliknya ia dilakukan ketika disunatkan solat sunat."

## 8. Keluar Dengan Berjalan Kaki Ke Tempat Solat

Daripada Ali bin Abi Tolib RA katanya: "Termasuk di dalam sunnah, mendatangi (solat) hari raya dengan berjalan kaki." [Riwayat al-Tirmizi "Hasan"]. Ibnu Majah meriwayatkan daripada Ibnu Umar katanya: "Adalah Rasulullah SAW keluar ke tempat solat Hari Raya dengan berjalan dan baginda pulang darinya juga dengan berjalan." [Sahih Ibnu Majah "Hasan"] Bagi mereka yang uzur atau rumahnya jauh dari musalla/ masjid tidak mengapa naik kenderaan.

## 9. Wanita Uzur Juga Keluar Menyaksikan Solat Hari Raya

Para wanita keluar untuk menunaikan solat hari raya adalah termasuk di dalam sunnah Nabi SAW. Dari Umm Atiyah RA katanya: "Kami disuruh oleh Nabi SAW untuk mengeluarkan mereka (semua wanita) pada hari raya Al-Fitri dan al-Adha; wanita yang baru baligh atau hampir baligh, wanita haid dan anak dara. Adapun wanita haid diasingkan daripada tempat sembahyang."

## 10. Zakat al-Fitr

Nabi SAW menyuruh membayar zakat al-Fitr sebelum solat hari raya. Harus mengeluarkannya sehari atau dua hari lebih awal berdasarkan hadis Ibnu Umar RA yang diriwayatkan oleh al-Bukhari: "Adalah mereka (sahabat Nabi SAW) mengeluarkan (zakat al-Fitr) sebelum hari raya sehari atau dua hari."

**Sebagai penutup, kita berharap Allah SWT memberi hidayah dan kekuatan kepada kita untuk sama-sama kita beramal dengan sunnah Nabi SAW dan Allah menerima segala taubat dan amal ibadat yang dilakukan sepanjang bulan Ramadhan serta memberi keampunannya kepada kita semua.**



# ANALISIS PERANG TABUK

Rosmawati Razak

## PENGENALAN

- Peperangan menentang kekuatan ketenteraan terbesar pada ketika itu iaitu Rom yang diketuai oleh Hercules.
- Perang yang terakhir disertai oleh Rasulullah SAW.
- Berakhirnya perang ini dengan perjanjian damai.

## MASA

- Perang ini berlaku pada tahun ke-9 Hijrah.
- Keberangkatan Rasulullah SAW ke Tabuk bermula pada bulan Rejab dan kepulangan baginda bersama rombongan adalah pada bulan Ramadhan.
- Perang ini mengambil masa selama lebih kurang 50 hari. 20 hari di Tabuk dan 30 hari perjalanan pergi dan pulang.

## JUMLAH TENTERA

- Disertai oleh 30,000 tentera Islam (tanpa kelengkapan perang yang cukup)- termasuk golongan munafik yang berpatah balik daripada ikut serta ke medan perang.
- Tentera Rom disertai oleh pasukan yang kuat dan besar iaitu seramai 40,000 pahlawan bersama kelengkapan perang yang mencukupi.

## PUNCA

- Punca berlakunya perang ini adalah disebabkan berlakunya pembunuhan utusan Rasulullah SAW yang bernama Harith Ibnu Umair al-Azdy di tangan Syurahbil Ibnu Amru al-Ghassany. Pada waktu itu utusan tersebut membawa surat daripada Nabi SAW kepada pemimpin Bushra.
- Rentetan itu, Nabi Muhammad SAW menghantar pasukan tentera di bawah Zaid bin Harithah untuk melawan tentera Rom di Muktah.
- Walaupun tentera ini tidak berjaya membalas kematian Harith Ibnu Umair terhadap musuh yang zalim tersebut namun mereka mampu meninggalkan kesan yang paling mendalam di dalam hati bangsa Arab. Banyak kabilah Arab memerdekakan diri daripada Rom.
- Rom merasa terancam dengan perkara tersebut. Sebelum revolusi berlaku di wilayah-wilayah Arab yang berjiran dengan mereka, maka mereka telah mempersiapkan pasukan perang yang juga disertai oleh kabilah-kabilah Arab daripada Dinasti Ghassan dan lain-lain untuk menentang umat Islam.
- Maklumat mengenai persiapan Rom telah tersebar ke Madinah. Setiap saat umat Islam dalam ketakutan.
- Rasulullah SAW yang terkenal dengan seorang pemimpin yang bijak tidak ingin membiarkan Rom menjajakkan kaki lebih jauh ke dalam wilayah Islam. Setelah mengamati semua keadaan dan cabaran yang ada, baginda memutuskan untuk berangkat menghadapi kekuatan Rom di sempadan Rom.

## Info

**Perang Tabuk ialah perang yang terakhir disertai oleh Rasulullah SAW.**

**Keberangkatan Rasulullah SAW ke Tabuk bermula pada bulan Rejab dan kepulangan baginda bersama rombongan adalah pada bulan Ramadhan.**

## CABARAN

- Golongan munafik mencipta muslihat dengan mendirikan Masjid Dhirar sebagai tempat yang menjadi sarang perbincangan dan perancangan jahat mereka untuk memusnahkan Islam. Mereka menjemput Rasulullah SAW solat di dalamnya namun Baginda menangguk kerana sibuk dengan persiapan perang. Pembinaan Masjid Dhirar ini dinukilkan di dalam al-Quran di dalam surah al-Taubah.
- Orang munafik iaitu Abu Amir yang menjadi orang tengah untuk berkomunikasi dengan Raja Rom bagi memaklumkan tentang persiapan dan keadaan tentera Islam.
- Musim kemarau yang panas. Kebiasaannya orang ramai menghadapi keadaan yang sangat sukar dan jarang keluar.
- Musim memetik buah telah tiba. Mereka lebih suka berada di kebun untuk memetik buah atau berteduh.
- Orang munafik yang berpatah balik daripada rombongan perang hasil pujukan Abdullah bin Ubay supaya mereka tidak bersusah-susah menyertai perang bersama Rasulullah SAW.



## PERISTIWA DI TABUK

- Setelah sampai di Tabuk, tentera Islam mendirikan khemah dan sedia untuk bertempur. Rasulullah SAW menyampaikan kata-kata semangat, khabar gembira tentang syurga sehingga mental pahlawan-pahlawan Islam benar-benar bersedia untuk berperang.
- Setelah mendengar bahawa Rasulullah SAW memberi semangat kepada kaum muslimin muncul ketakutan dan kekuatan di pihak musuh.
- Mereka tidak berani bergerak dan merancang serangan.
- Rasulullah SAW didatangi oleh pemimpin Ailah, penduduk Jarba' dan Adruj yang telah menawarkan perjanjian damai.
- Rasulullah mengutus Khalid al-Walid ke Daumah al-Jandal bersama 420 penunggang kuda dan mereka berjaya menawan ketua Daumah al-Jandal iaitu Ukaidir dan dia menebus dirinya dengan harta dan bayaran cukai.
- Pasukan orang Islam meninggalkan Tabuk dengan kemenangan dan mendapat pertolongan daripada Allah. Tentera Islam ditakuti kerana kekuatan dan keizzahan serta keberanian Rasulullah SAW menghadapi musuh walau dalam kesusahan dan kekurangan.

Rujukan:

Ar-Rahiq al-Makhtum oleh Syeikh Sofiyurahman al-Mubarakfuri.

## KESAN

- Di dalam perjalanan pulang 12 orang daripada golongan munafik hendak menyerang Nabi SAW namun tidak berjaya kerana mereka telah dikesan oleh Ammar dan Huzaifah. Rasulullah mengutuskan Huzaifah untuk mengejar mereka. Huzaifah mengkhabarkan nama-nama mereka kepada Rasulullah SAW dan apa kehendak mereka. Daripada peristiwa itu, Huzaifah digelar sebagai "pemegang rahsia Rasulullah SAW".
- Rasulullah SAW mengarahkan Masjid Dhirar dimusnahkan bagi menghancurkan tempat segala perancangan jahat orang munafik yang sentiasa berharap Rom dapat menghapuskan pasukan Islam.
- Orang-orang munafik seramai 80 orang lebih yang berpatah balik memberi pelbagai alasan dan Rasulullah SAW meminta keampunan untuk mereka.
- 3 orang mukmin yang lurus iaitu Kaab bin Malik, Murarah bin Rabi'ah dan Hilal bin Umayyah menceritakan sebab tidak ikut serta dalam perang. Sebagai hukuman Rasulullah SAW mengarahkan para sahabat memulaukan mereka dan isteri mereka juga diarahkan untuk memulaukan mereka sehingga Allah menurunkan keampunanNya dalam surah al-Taubah ayat 118.


Sesungguhnya Allah mencela orang-orang munafik dan memuji orang-orang yang berjihad di jalanNya.

## IBRAH

- Ujian cinta kepada harta dunia yang menjadi penghalang untuk berjihad di jalan Allah.
- Harta, keluarga, keseronokan dan keselesaan merupakan ujian terbesar umat Islam untuk menegakkan agama Allah, menegakkan amar makruf nahi mungkar dan menyeru pengabdian hanya semata-mata kepada Allah SWT.
- Bahaya orang munafik yang berpura-pura memberi sokongan kepada Islam tetapi bersifat musuh dalam selimut. Golongan inilah yang menjatuhkan Islam.
- Allah dan RasulNya sangat membenci dan murka dengan golongan munafik sehingga Allah menurunkan ayat al-Quran apabila Rasulullah SAW mensolatkan jenazah dan memohon keampunan untuk pemimpin munafik iaitu Abdullah bin Ubai bin Salul walaupun Umar cuba untuk menghalanginya. Selepas itu turun ayat al-Quran yang membenarkan sikap Umar.
- Banyak ayat-ayat daripada surah al-Taubah yang menceritakan tentang peperangan ini sama ada sebelum dan selepas berlakunya peristiwa Tabuk.
- Sesungguhnya Allah mencela orang-orang munafik dan memuji orang-orang yang berjihad di jalanNya dengan ikhlas dan bersusah payah. Allah juga menerima taubat daripada orang-orang mukmin yang lurus.



**UJI MINDA ANDA!**



**MENEGAK**

1. Tidak terpengaruh dengan nikmat dunia.
3. Tetap dan berterusan dalam amalan kebaikan.
4. Kata lain bagi 'ganti'.
7. Ketua tentera Rom dalam perang Tabuk.
10. Sunnah yang agung di pagi hari raya.

**MELINTANG**

2. Makanan yang sinonim dengan bulan Ramadhan.
5. Menghidupkan malam dengan amal ibadat.
6. A malan bulan Ramadhan yang berkait dengan al-Quran.
8. Rukun Islam kedua.
9. Permainan merbahaya tetapi disukai kanak-kanak terutama di bulan Ramadhan.

1. ZUHUD 2. MURTABAK 3. ISTIOAMAH 4. QADHA  
5. QIYAMULLAIL 6. TADARUS 7. HERCULES  
8. SOLAT 9. MERCUN 10. TAKBIR



**BULETIN  
AL - IRSYAD**

**Edisi 4: Ramadhan**

**Penaung**

Dr. Hj Mohd Zahari Bin Ismail

**Penasihat**

Puan Azlida Binti Ahmad

**Penasihat II**

Puan Zuraiha Binti Mohd Zain

**Ketua Editor**

Norhafizah Binti Mohd Ghazali

**Editor Syariah**

Rosmawati Binti Razak

**Sub Editor / Pruf**

Ainul Farhaan Binti Harun

**Konsep dan Layout Buletin**

Ainul Farhaan Binti Harun

**Penulis Jemputan**

Dr. Jailani Bin Abd Kadir

**Penulis Artikel**

Suhaila Binti Mustaffa  
Azirah Binti Seman  
Roshadah Binti Abu Bakar  
Norhafizah Binti Mohd Ghazali  
Zurairah Binti Mohd Zain  
Razak Bin Nordin  
Ainul Farhaan Binti Harun  
Mohd Hanafi Bin Jusoh  
Rosmawati Binti Razak

